

LIBRI I PROFETIT HAGAI

Thirrje për rindërtimin e Tempullit

1 Vitin e dytë të mbretërimit të Dariut, ditën e parë të muajit të gjashtë, ♦ Zoti i dha profetin Hagai një porosi për Zerubavelin, birin e Shealtielit, guvernatorin persian në Judë, dhe për kryepriiftin Jeshua, birin e Jocadakut. ²⁻³Hagai shpalli në emër të Zotit:

”Perëndia, Zoti i gjithëfuqishëm, thotë: «Ky popull pohon se është ende tepër herët për ta rindërtuar Tempullin tim. ⁴Por, shihet qartë se nuk është tepër herët, sepse ju banoni në shtëpi madhështore, kurse shtëpia ime është në gërmadha! ⁵Por vëreni se si po ju ndodh juve! ⁶Ju keni mbjellë fara të shumta, por keni mbledhur të korra të pakta. Drithi nuk mjafton për t’ju ngopur, as vera për të pirë sa duhet. Ju duhet të ngrini, sepse nuk keni mjaft rroba për t’u veshur. Dhe paga që merr punëtori, i tretet në dorë.»

⁷Prandaj Zoti i gjithëfuqishëm thotë: «A nuk vëreni se pikërisht për këtë po ju ndodh keq? ⁸Shkoni në mal, pritni dru dhe ndërtoni Tempullin tim! Kjo do të më pëlqejë: kështu do të më nderoni! ⁹Ju keni shpresur shumë, por keni arritur pak. Kur dëshironit ta sillnit frytin e punës suaj në shtëpi, ishte sikur ta kishte marrë era. A nuk dini përse bëra të ndodhte kështu? Shtëpinë time e latë në gërmadhë, dhe secili mendon vetëm se si të ndërtojë shtëpinë e vet! ¹⁰Prandaj nuk ka as vesë e as shi, dhe asgjë nuk mund të rritet më. ¹¹Për këtë kam bërë që kjo thatësi të bjerë mbi vendin tuaj, mbi male, arat e drithit, vreshta dhe kodrat e ullinjve, që të mos lulëzojë më asgjë. Njerëzit dhe kafshët duhet ta pësojnë nga të gjitha këto, dhe çka do të ndërmerri, nuk do të ketë sukses.»

♦ nga fundi i gushtit të vitit 520 p.e.r. Kjo profeci u dha brenda katër muajsh

Zoti premtot të ndihmojë ndërtuesit vullnetarë

¹²Zerubaveli, Jeshua dhe mbarë populli u prekën thellë nga ajo që Zoti, Perëndia e tyre, njoftoi nëpërmjet Hagait. Ata pranuan se Zoti ua kishte dërguar profetin, dhe u frikësuan që nuk e kishin nderuar Zotin siç duhej. ¹³Pastaj Zoti tha nëpërmjet lajmëtarit të tij, Hagait: «Unë do t’ju përkrah. Këtë premtot unë, Zoti.» ¹⁴⁻¹⁵Kështu, Zoti përgatiti guvernatorin Zerubavel, kryepriiftin Jeshua dhe mbarë popullin për të ndërtuar Tempullin e Perëndisë së tyre, Zotit të gjithëfuqishëm. Ata e filluan punën ditën e 24-të të muajit të 6-të.

Madhështia e ardhshme e Tempullit

2 Vitin e dytë të mbretërimit të perandorit Dari, ditën e 21-rë të muajit të 7-të, Zoti i dha profetin Hagai edhe një porosi për guvernatorin Zerubavel, kryepriiftin Jeshua dhe për mbarë popullin. Profeti u tha:

³”Kush prej jush e pa Tempullin para se të shkatërrohej? Sa madhështor ishte atëherë! E sa i mjerueshëm është ai që shihni të ngrihet para syve tuaj. Ndërtesa nuk është asgjë në krahasim me atë që qëndronte këtu më parë. ⁴Por Zoti thotë: «Mos t’ju lëshojë zemra! Në punë, o Zerubavel! Në punë, o Jeshua! Në punë, o burra të Judës! Do t’ju përkrah. Kështu them unë, Zoti i gjithëfuqishëm. ⁵Ju kam premtuar t’ju përkrah, kur u larguat nga Egjipti, dhe ky premtim vlen edhe sot. Unë jam mes jush me fuqinë e shpirtit tim, mos kini frikë!

⁶Unë, Zoti i gjithëfuqishëm, po ju them: Pas pak do ta tund botën nga themelet, qiellin dhe tokën dhe detin. ⁷Do t’i tmerroj të gjithë popujt, që t’i sjellin këtu thesarët e tyre. Kështu do të kujdesem që shtëpia ime të stoliset në mënyrë madhështore. ⁸Sepse mua, Zotit të gjithëfuqishëm, më takon i gjithë ari dhe argjendi. ⁹Tempulli i ri ♦ do t’ia kalojë shumë të vjetrit. Prej kësaj ndërtese do t’i jap popullit tim paqe dhe mirëqenie. Këtë e them unë, Zoti i gjithëfuqishëm.»

♦ Është fjala për Tempullin e kohës së mbretërimit të Mesisë.

A mund të marrin pjesë samarianët në ndërtimin e Tempullit?

¹⁰Vitin e dytë të mbretërimit të Dariut, ditën e 24-të të muajit të 9-të, Zoti i tha profetin Hagai: ¹¹”Unë, Zoti i gjithëfuqishëm, të urdhëroj: Shko te priftërinjtë dhe informohu! Pyeti: ¹²«Në qoftë se ndokush mban në fundin e petkut mish që është shuguruar për mua dhe që mund të hahet nga priftërinjtë, dhe në qoftë se me fundin prek një copë buke ose diçka të zier, ose verë, ose vaj ose ndonjë ushqim tjetër: a shugurohet nëpërmjet kësaj edhe sendi i prekur, i cili u rezervohet pastaj priftërinjve?»” Hagai ua drejtoi pyetjen priftërinjve dhe mori përgjigjen: «Jo.»

¹³Pastaj i pyeti priftërinjtë në emër të Zotit: «Në qoftë se ndokush prek një të vdekur, dhe kështu bëhet i papastër, dhe pastaj prek njërin prej këtyre sendeve: a bëhet edhe sendi i prekur i papastër?» Priftërinjtë u përgjigjen: «Po.»

¹⁴Pastaj Hagai tha: ”Zoti thotë: «Për mua ky popull është i papastër. Prandaj gjithçka që bën ky popull, bëhet e papastër, dhe çdo vend ku kushtojnë fli, bëhet i papastër.»

Dëgjesa e kishës do të japë fryte

¹⁵⁻¹⁶Zoti shtoi: «Hidhni një shikim prapa. Para se të fillonit t'i rindërtonit muret e Tempullit, prodhimi i një fushe ishte vetëm dhjetë në vend të njëzet thasëve me drithë të pritur, kurse prodhimi nga një vresht vetëm njëzet në vend të pesëdhjetë shtambave të pritura. ¹⁷Ju dërgova breshër, ndryshk dhe urth, dhe asgjësova tërë punën tuaj. E megjithatë nuk donit të ktheheshit tek unë. ¹⁸Kështu qëndroi puna, deri sot, deri në ditën e 24-të të muajit të 9-të, dita kur mbaroi ndërtimi i themeleve të Tempullit. ¹⁹Depot e drithit janë të zbrazëta, hardhitë, fiqtë, shegët dhe ullinjtë nuk japin asnjë frut. Por qysh tani do ta bekoj vendin tuaj dhe do të bëj që të lulëzojë gjithçka.»

Zerubaveli – pasqyra e mbretit të ardhshëm shpëtimtar

²⁰Zoti foli me Hagain përsëri ditën e 24-të të muajit. ²¹Ai i dha urdhër t'i transmetonte Zerubavelit, guvernatorit të Judës, këtë porosi: «Unë, Zoti i gjithëfuqishëm, do t'i tund qiellin dhe tokën nga themelet. ²²Do t'i përmbys fronet e mbretërve dhe do t'i jap fund sundimit të popujve; do t'i përmbys karrocet e luftës bashkë me kalorësit e tyre, kurse kuajt do t'i rrëzoj përtokë, që kalorësit ta sulmojnë njëri-tjetrin me shpata. ²³Atë ditë do të emëroj ty, Zerubavel, biri i Shealtielit, guvernatorin tim. Do të të përdor si unazë për vulë. Kështu them unë, Zoti i gjithëfuqishëm.»

